



ATASSUT INATSIARTUNI

ATASSUT

UKA 2013/69-1

Gerhardt Petersen

22.10.13

Ingerlatseqatigiiffiit tamakkiisumik ilaannakoortumilluunniit akiliisartut il.il. eqqarsaatigalugit ingerlatseqatigiiffinnut akileraarutip 1. januar 2015 aallarnerfigalugu 20%-nut appartinnissaa pillugu kingusinnerpaamik UKA2014-mi inatsisip allanngortinnissaanut siunnersuummik saqqummiusseqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Jens B. Frederiksen aamma Andreas Uldum, Demokraatit)

Demokraatit sinnerlugit Inatsisartuni ilaasortat Jens B. Frederiksen aamma Andreas Uldum matumani siunnersuuteqarput ingerlatseqatigiiffinnut akileraarut ullumikkut 30 procentiusoq 1. Januar 2015-miit 20 procentimut appartinneqassasoq.

Ingerlatseqatigiiffinnut akileraarutip appartinneqarnissaa ATASSUT-mit pingaartillugu anguniagaraarput, taamaattorli aamma inuiaqatigiit aningaasarsiornikkut killiffiat eqqarsaatigalugu anguniagaq taanna ukiut ingerlanerini qaqqillattaartuarparput nalilersortarlugulu.

Ukiuni makkunani inuiaqatigiit annertuumik alloriarnissatsinnut piareersarpugut, aatsitassarsiorniartunut suliffissualiorniartunullu matorput ammaraluttuarparput, tamatumalu malitsigisaanik inuiaqatigiinnut iluaqutissiinissaq annertunerpaaq anguniarlugu akileraartarnikkut akitsuusiisarnikkullu anguniakkat sulissutigisallu nalilersorluaqqissaagassaasut ATASSUT-mit naliliivugut.

Qanorluunniimmi anguniakkatsinnut tungaviumik naapertuutsigigaluarpat 10 procentimik appaaneq piviusunngussappat allatigut isertitassarsiornissaq pinngitsoorneqarsinnaassanngilaq, taamaammat piviusorsiornerusumik aammalu ingerlatseqatigiiffiit pisortallu tamarmik peqataaffigisinnaasaannik nassaarniartoqartariaqartoq ATASSUT-mit naliliivugut.



ATASSUT INATSISARTUNI

Tamatuma saniatigut aamma isiginiarneqartariaqarpoq aatsitassarsiornermik uuliasiornermilluunniit ingerlataqarumallutik ingerlatseqatigiiffiit nunatsinniilereersut nunatsinniilerumaartussallu taakkunungalugu sanilliullugu nunatsinniittut ingerlatsiviit minnerusut annerusullu ataqatigiissumik aammalu aningaasaliiumassutsimut innarliutaanngitsumik aqqissorneqarnissaat pisariaqarmat.

Naak massa ingerlatseqatigiiffinnut akileraarutip appartinneqarnissaanik ATASSUT-mi siunertaqaralualuta siunnersuut manna siuliani oqaatigisagut innersuussutigalugit imaaliinnarluta akuersaaruminaatsipparput.

Siunnersuulli manna ATASSUT-mit kivisiinnarusunngilarput, tunngavilersuutai misissorluarneqartariaqarput aammalu periarfissaq iluatsillugu ingerlatseqatigiiffinnut akileraarut pillugu nalilersueqatigiittoqartariaqarpoq, taamaammat ATASSUT-mit inassutigissavarput siunnersuut Inatsisartut Aningaasaqarnermut Akileraartarnermullu Ataatsimiititaliaanut nalilersugassanngorlugu ingerlateqqinneqassasoq.